

Kayëte nte kerëhnëkëhni Pol vëvë Galasi Wade yehëhna hnë inji kayëte

Afayik Pol herëhnëkëhni vacery sali vante ye Galasi va inji kayëte yëbëlan bëhn wafëhw wahnah g'imbëd gë warar gë bëhn wafëhw imbëd g'imbëd (48 gë 55) ga ndëcëk hnagi Yesu ÿa. Pol njihahnëko vankol Galasi va soñe karanëhni Wanës Wakasëk ña. Ntik rac fagant vële ye wasëwif gë vële wok vëyena wasëwif do vëyabah kwëtahnëniha Yesu.

Ante kërënak Pol ña, biÿëna dënk vëryampo nijjëni pëyanihëhni vële hwëtahnëk va tëfëka kacini had gante tëyëk sariya Moyis soñe Wënu ña maŵëhni. Ga nkwëryëk Pol ga nësëde watac kerëk anji kayëte. Nësëd gë wanës wayaŵah soñe pacënëhnëhni vëvë Galasi va afo ikwëtahn ntëŵ hni Yesu ña hoð pehëtëhni. Ntehnëkëhni Wënu ña maŵëko Abëraham cat haryënk w lëŵu ani gë kacahnënde ÿa. Afo ikwëtahn ña hoð ntihna ahnë asatah haryënk Wënu ña, do rac hoð njiryerya ahnë a nuÿa uwám ule hnëñëdëha Wënu ña.

Wëlin wanës wawkëhn nafa hn'inji kayëte: Sariya Moyis gë Wanës Wakasëk, vëfaya gë vëramp, wasëwif gë vële wok vëyena wasëwif.

Wëlin gante nke kayëte ka:
Simpayi (1.1-5)

Paryi Pol afayik ye do ile nēsēk ya toña ye (1.6–2.21)
Sariya ma ikwētahn (3.1–4.7)
Uryēñah Pol soñe vëvë Galasi (4.8–20)
Soñe Agar gë Sara (4.21–31)
Igo afaya (5.1–15)
Imbahn gë Iyir (5.16–6.10);
Wanēs watēkwa (6.11–18).

Simpañi

¹⁻² Ami Pol herēhnēryidēhu ani kayēte, wūhnē vëvë vacery sali vambë Galasi vi. Yesu Këris gë Wën Rēm le vëhnēndanēka vësēm ÿa rēhnako, matina hnē vahnē, gena gë fere ahnē liko afayik. Nkañyēryiderun, ami gë vëyēnta mën vële yebun ani vi fop:

³ Arabi Wënu ña, Rēm fu ÿa g'Ahwēhn a Yesu Këris ndēwanihu do njēdēnihu yam ÿa!

⁴ Ahwēhn a njēdāhnēk ntañary dēwu ña soñe cosahnahn inav wameh fu ña. Koyēna ntiñetēkēfu hnē imēk meh iñi duniña vë gaki ÿi, gante ñadēho Wën Rēm fu ka.

⁵ Arabi cēmbēnde Wënu ña kwëlēkwël! Am-ina.

Wanēs Wakasēk wēdampo fo

⁶ Ami pēmpēhnahnēko soñe gante njancērun aravuna Wën ki! Macēku gë ipērēna Këris ña, bare wūhnē, tavērun Wanēs Wakasēk wadēwu ña, wakañary hnēpadun.

⁷ Do ile ye toña ÿa, umē ye wakañary gena. Vahnē fo ÿad nkwēcētēni Wanēs Wakasēk Këris ña do wañēmpañehndēhu.

⁸ Awa ge ahñë yijëk pëyahñënd Wanës Wakasëk wante hnëmpëlëk gë wante fëyayirun ñi, wëla nke aryampo hnë fuhnë vëfayik hna ma wëla nke dënk mëleka ile wâtik g'ambin, arabi ndëwani wëh!

⁹ Tëkëmu fëyaŵu do mbokëbu rëfëtanëhnëndu tame: ge ahñë pëyaðëhu Wanës Wakasëk wanëmpëlah gë wante wãwërun ñi, arabi ndëwani wëh!

¹⁰ Tame maŵëhnëniho vahnë bi yëkëlehnëðëfu? Ma Wënu ña ýaðëfu maŵëhno? Vahnë bi yëkëlehnëðëfu nëñahnëhni g'ami? Ge vahnë rëkakëndëbu yëkëlehnëndu ha gaki, nëñahnëhni g'ami, gekënda aryokuñëhn Këris ýa.

Wënu ña tëhnaka Pol nke afayik

¹¹ Vëýënta mën, ñaðëfu ayëtu wapacëk: Wanës Wakasëk wante hnësëhnëðëmuno ña matina hnë vahnë.

¹² Gena ahñë yëðako ma harañëko, bare Yesu Këris yëtëndanëko.

¹³ Nkwëryërun ga nësëðe gante nkeho nkeya mën ña ante nkoðuho hnë ikwëtahn wasëwif ña. Njëterun gante koroteyehnëðëfuho ðus cery sali Wënu ýa do njëkëlehnëðëfuho rëkwehnu ka.

¹⁴ Hnë wati rac, ntëbëbuhëhniwo hnë ikwëtahn wasëwif hna vëjarënta mën wasëwif vëyabah. Ha, njawënëðuho namu warëm fu wã.

¹⁵ Bare Wënu ña tëhnakowo koðëri nte nkoðuho nagila ña do, g'ipërëna dëwü ña, macëko soñe ryokuñëhnëndëwã. Do ante tëkëko wati ña,

¹⁶ nëṇṇəkawo njëtəndanowa Aju soṇe yiwu fëyaŵəhni vële wok vëyena wasëwif va. Awa, hnë wati rac wëla aryampo tëyëlëwawohna nkabo ile rëfëko liwu ŷa.

¹⁷ Wëla Yerusalem hna dënk yilëŵohna soṇe hnulëfu vële ryënkwëko nkeni vëfayik va. Bare taṇ njibuho Arabi hna, tac vokaw Damas.

¹⁸ Tac, ante ndëcëko wabëhn watar ṇa, njibu Yerusalem soṇe yëtëlëfu gë Piyer, do wafac ipëhw g'imbed ŷëŵëlahnëbunëho.

¹⁹ Hnë wati rac nulëwaŵohna afayik ahaŵary; Sak fo nubuh, aheryu Ahwëhn a.

²⁰ Ile herëndëmu ŷi toṇa ye, gena wamër. Wënu ṇa sedë ye.

²¹ Ga matëbu hnam umë yibu hnë waresiŷo Siri do Silisi hna.

²² Hnë wati rac fop vëvë vacery sali vambë Yude va vëyëtëlowohna.

²³ Wanës ṇa fo nkwëryëdëniho ga nësëde: «Ale horoteyehnëdëhëfuno ŷa, fëyahnëd tame ikwëtahn nte njawëredëho tëkwehn ṇa»,

²⁴ do cëmbëdënihawo Wënu ṇa soṇe lëmën ŷa.

2

Pol gë vëfayik vëŷëntaw va

¹ Tac, ga ndëcëk wabëhn ipëhw gë wahnah (14), më vokabu Yerusalem gë Barënnabas; njobunëhawo Tit fëna.

² Mbokabunëho kabi Wënu ṇa yëtəndanëkowo yiwu. Hnam, hnë humbar hunte varëbunëho fuhnë fo, nësëhnëbuhëhniwo

vële fëlayik had vësankaf cery sali va Wanës Wakasëk wante fëyaðëfuhëhni vële wok vëyena wasëwif va. Ñaðëwõhna ðoku ile libu koßëri ÿa hafo dol ÿi nke nafa këm.

³ Tit, nte yebunëho ña, mama nkeho gërek, porosiñilohna dënk soñe káci.

⁴ Nkwajëla soñe háci ÿa nkeho kabi vële wok vëhwëtahnëna paryi rënkëko fagant fu. Njijëniho njëkëtehnani njëtahnëni gante ntidiëni ntihëtahnëni ige afaya fu ka nte hnuÿabun hnë ißëmënkël fu gë Yesu Këris ña; ñaðëniho mbok ntinihëfu vëramp sariya.

⁵ Bare maŵëntëfuniwohna vëÿi vahnë, wëla wati ryampo, soñe nko ayawëñëhnahniwu toña Wanës Wakasëk ña.

⁶ Age vële fëlayik had vësankaf cery sali va ye, ile nkeniho ÿa kwëhnana nafa soñe lëmën kabi Wënu ña yëkëðina ile nke ahnë. Vëÿi vahnë vëwëñëhnëlohnä ñoñ ile harañëðëfuhëhni vahnë.

⁷ Nuni Wënu ña payëkowo yiwu fëyaŵëhni Wanës Wakasëk ña vële wok vëyena wasëwif va, gante payëkowo Piyer pëyahni wasëwif ka.

⁸ Ale lika Piyer afayik wasëwif, umë liko ami fëna afayik vële wok vëyena wasëwif.

⁹ Sak gë Piyer do gë San, vële fëlayik had vësankaf cery sali va, njavëtëni ðoku ile kwëtehnahnëko Wën ÿa; më njelëhnënihëfu wëbák ña fëlalëfu ami gë Barënabas tufahnahnëni nkehahn dahëse maŵal yëbëlan fu. Koyëna, maŵalëbunëho fuhnë fop soñe fuhnë yifu gë vële wok vëyena wasëwif, vëhni njini gë

wasëwif.

¹⁰ Inë ryampo fo ye ile tëyënihëfuno ÿa: umë ye ryënkwëtandëfuni vëhaÿëhnah vëvë cery sali lëw hni va, do ami fëna umë ÿankahnëkowo lindu.

Pol niradëha Piyer

¹¹ Bare ante tëkëko Piyer Antiyos ña, nirabuhawo satën fo, kabi ntëntëdëho.

¹² Ani gë tëkahnëndëni vële payëko Sak va, vële yawënëk namu háci va, Piyer gë vële wok vëyena wasëwif va tokëlahnëdëniho; bare ga tëkëni vërac, pëgwëko pitandëhni, golohna tokëlahnëndëni, kabi ntakëkawo.

¹³ Wasëwif waÿëntaw wale hwëtahnëkawo Yesu wä tëfaryënihawo Piyer hnë nkeya meh ntëwu hna, hafo Barënabas fëna tëfënti nkeya tac!

¹⁴ Bare ga nubu vëréfëna toña ile karanjéd Wanës Wakasëk ña, nirabuhawo Piyer tase vahnë fop lehnëwa: «Ge wëjë ale ye sëwif ÿa, nufëru nkeya vële wok vëyena wasëwif va, awa hak kodu aforosinjëndëhni vële wok vëyena wasëwif va nufëni nkeya wasëwif?»

¹⁵ Fuhnë, wasëwif hnaginëkëfu, geyilënëhna vële wok vëyena wasëwif, geyilënëhna vëwen.

¹⁶ Njëtinëk wapacëk, Wënu ña dehnëdilahna ahnë catëk kabi maÿëhnëk sariya Moyis, bare ntehnëdëha catëk kabi kwëtahnëka Yesu Këris. Fuhnë fëna gë ikwëtahn Yesu Këris ña njavëtinëkëfu catinëk gena g'imawëhn sariya Moyis. Toña ye, Wënu ña dehnëdilahna wëla aryampo catëk kabi maÿëhnëk sariya Moyis ÿa.

17 Bare ge kwëtahninëka Yesu Këris soŋe ntehninëfu catinëk, do njavëtate vëwën yeyinëk had vële wok vëyena wasëwif va, umë ntehnëde bi Këris ÿa liyehnëdëhëfu wameh? Muk!

18 Age mbokanëbu sariya Moyis le ravëbu ÿa, ntiyadëfu ale wok tëfëna sariya.

19 Toña ye sariya ÿa njonëhniko icëm. Cëmëbu soŋe lëwu. Do tame ntidëfu fop ile hnëŋëdëha Wënu ña. Gë Këris ÿa cëmëlahnëbun kërëwa hna.

20 Nkobu yënëndu, bare gena ami wok yënëd, Këris ÿa yënëd hnë ami. Tame, nkeya mën mba vahnë ña, ankeya kwëhn g'ikwëtahn Ajë Wënu ña ye, umë ale ÿahnëko do yëdahnëk ntaŵary dëwu ña soŋe lëmën.

21 Dihëtëda nafa ile ntinëhnëkëfu Wënu ña. Toña ye, ge sariya ÿa satënëd, awa icëm Këris ña kwëhnana nafa!

3

Sariya ma ikwëtahn

1 Wuhnë vëvë Galasi vi, nambërun hakili! Mo ga havëku? Tufëmu wapacëk Yesu Këris pakiko hnë kërëwa hna!

2 Uwi rëy fo ÿadëfu alëkwawuno: g'imaŵëhn sariya ña bi nuñarun Iyir Wënu ña ma g'ikwëtahn Wanës Wakasëk ña nke?

3 Hak kodun ahnambu hakili aki? G'iyir Wënu ña pëgwërunëho; tame ñadun bi afuhnawu gë wëfanka hun ŵa dënk?

4 Ile hnurun do yëtërun ÿi fop, kwëhnana bi nafa? Diyahnëlohna koyëna nke!

⁵ Gena bi Wënu ɲa njëdaku Iyir ɲa do ntid hnë wuhnë viyë vifëmpëhnahnah? Soɲe ile wawëndun sariya ɲa bi ntid virac, ma kabi Wanës Wakasëk ɲa hwëtahnërun?

Ahnë catëdina gë sariya

⁶ Yëkëryina Abëraham: «Më kwëtahnëka Ahwëhn a Wënu ɲa do Ahwëhn a Wënu ɲa soɲe rac catahnëka g'Abëraham.»✧

⁷ Awa, tëfëka ayëtu iyin: vële hwëtahnëka Wën va fo ye vëva Abëraham va.

⁸ Do fëna Vikerëh va mbiyëk ga nësëk, Wënu ɲa catahnëdëha gë vële wok vëyena wasëwif va soɲe ikwëtahn dëw hni ɲa. Soɲe umë ye, pëyahnik Vikerëh hna Wënu ɲa ntehnëkawo Abëraham kobëri fo: «Soɲe hu ɲa ndëwadëfuhëhni wabulunda ɲa fop.»✧

⁹ Awa, vële hwëtahnëk va, Wënu ɲa ndëwadëhëhni had gë Abëraham ale hwëtahnëko ka.

¹⁰ Fop vële ntiyahnëk sariya ɲa catënëdëhëhni va hn'idëwan meh Wënu ɲa nkeni, kabi kerik hnë Vikerëh hna: «Meka ale wok tëfëdina kwëlëkwël fop ile herik kayëte sariya hna.»✧

¹¹ Do tëk pac, sariya ɲa catënëdina ahnë haryënkW Wën hna. Vikerëh va nësëk: «Ale satëk g'ikwëtahn nkod kwëlëkwël.»✧

¹² Bare sariya ɲa nëmpëlëk g'ikwëtahn inja. Vikerëh va më lehnëk: «Ale lik ile ntehnëk sariya ɲa, nuɲad uwam paryi wä.»✧

✧ **3:6 3:6:** Wapëgwala 15.16 ✧ **3:8 3:8:** Wapëgwala 12.3; 18.18; 22.18 ✧ **3:10 3:10:** Divëta Sariya 27.26 ✧ **3:11 3:11:** Abakuk 2.4 ✧ **3:12 3:12:** Soɲe Walevi 18.5

¹³ Këris ÿa cosahnëk soje pehetahnëfu hn'idëwan meh Wën nte njojëk sariya ña; maŵëk nke idëwan meh Wën nte rëfëkawo nuÿayin ña. Vikerëh va pëyahnëd: «ale-wo-le hanëde hn'atëh* hna ale ryëwanik ŵeh ye.»

¹⁴ Rac nke koyëna soje vële wok vëyena wasëwif va nuÿantahnini gë Yesu Këris idëwan përen nte ntehniko Abëraham njëdade ña. Awa g'ikwëtahn ña, nuÿaden Iyir Ipacah nte ntehnëk Wën njëdahnëd ña.

Sariya gë ile ntehnëk Wën njëdadëha Abëraham

¹⁵ Vëÿënta mën, yëkënëfu ile ryëcëtaď hnë đuniÿa li: ge ahnë a kahnëndëk akwëtëla soje wadëŵu ña gante canëk ka, ahnë kodina nkwaj watac ma nkwën iñë.

¹⁶ Awa, Wënu ña ntehnëko ntinëhnëdëha Abëraham viÿë vifëren do gë ale hnagëde hnë umë ÿa.☆ Vikerëh va dehnëna: «gë vële hnagëde hnë umë va», had wëjë lehnëk vahnë vëyabah ye, bare «ale hnagëde hnë wëjë», umë fëhnëtanëd aryampo fo ye: umë ye Këris ÿa.

¹⁷ Awa, ile hnësëhnëdëmu ÿa, umë ye: Wënu ña gë Abëraham kahnëndëko akwëtëla ntëŵu ña ten, tac, ante nuÿako kwëtëla ña wabëhn wakeme wahnah gë wafëhw warar ña (430), tëkiko sariya Moyis ÿa. Bare wëla toyë kodina ñaÿët nafa akwëtëla ña do ntihët ile ntehnëkawo Wën Abëraham ÿa.

* **3:13 3.13** *Ale-wo-le hanëde hn'atëh:* Mëntëndëlehnëk gë kërëwa ÿa. (Divëta Sariya 21.22-23) ☆ **3:16 3.16:** Wapëgwala 12.7

¹⁸ Ge gë sariya ÿa nuÿade dëw ña, awa godina gë ile ntehnëkawo Wën Abëraham ÿa. Bare gena koyëna. Soñe akwëtëla ña njëdëka Wënu ña Abëraham dëw ña.

¹⁹ Awa, ye yeho doku sariya Moyis ÿa? Nkwëniko soñe vankeya vameh vahnë hafo tëki ale hnagëde hnë hnënk Abëraham ÿa. Soñe lëwu ÿa ntiko Wënu ña ile ntehnëkawo Abëraham ÿa. Iÿi sariya, wamëleka yëtëndanëkawo Moyis do umë yeho ahnësëhn vahnë ÿa.

²⁰ Bare ante kwëtëlëdëniho Wënu ña gë Abëraham ña, Wënu ña ßalëlawohna gë ahnësëhn; paryi nke Wënu ña, umë fo hahnëndëko.

²¹ Tame, sariya Moyis ÿa nkwajëk bi ile ntehnëka Wën Abëraham ÿa? Muk! Ge sariya ile kahnëndëk Wën gë Moyis ÿa kokënd njëdähni vahnë va uwám paryi wã, awa ahn'a ntehnëde sariya ÿa kod catëna.

²² Bare gena rac. Vikerëh va tufahnëd duniÿa ÿi fop hnë imëk wameh hna nke soñe Wënu ña ntihahn ifërën ile ntehnëkawo Abëraham ntinëhnëdëhëhni vële hwëtahnëka va soñe ikwëtahn dëw hni Yesu Këris ña.

²³ Ani gë tëkahnindo Këris ÿa, umë ale rëfëko kwëtahnin, sariya ÿa likëfuno vëramp, hafo hale njëtëndaninëkëfu ikwëtahn tac.

²⁴ Koyëna sariya ÿa yeho had ayëka fu ÿa hn'inkaw nte faßarëkëfu Këris hna, catënahninëfu g'ikwëtahn.

²⁵ Tame, Këris tëkik, tëfëka kwëtahnina; goy-ilënëhna hn'iyëka sariya hna.

²⁶ Fop vutah Wën yerun soŋe ikwëtahn hun Yesu Këris ɲa.

²⁷ Wühñë fop njaryirun tufahnahni gë Këris ỹa nkerun, umë sudarun.

²⁸ Tame wühñë fop aryampo yerun hn'ibëmënkël gë Këris. Soŋe umë ye sëwif ma ale wok gena sëwif gona, aramp ma ale ye afaya gona, asan ma asëval gona.

²⁹ Do ge Këris ỹa hwëhnëku, awa vëva Abëraham va yerun do nuɣadun idëw ɲa gante ntehnëk Wën ka.

4

Vutah Wën

¹ Awa, ile hnësëhnëdëmu ỹa, umë ye: ge ale rëfëka ntëw ỹa fatah fo wok, umë vëhnëmpëlëna gë aramp, mama nkehahnëk umë ale hwëhnëk fop ỹa.

² Tëfëka ma wëhnëhni vële wënkëka umë gë vilëwu va hafo tək wati ile kahnëndëk rëmu ỹa.

³ Koyëna nke soŋe lëw fu ỹa fëna. Kobëri ɲa had vutah nkeyinëko, wënamu wavë duniɣa wi likëfuno vëramp.

⁴ Bare ante təkëko wati le kahnëndëk Wën ỹa, payikawo Aju: naga asëval, do ma wëko nke hnë imëk sariya Moyis hna.

⁵ Njijëko soŋe pehëtëhni vële tampëko sariya va, do kolahnin nkeyin vutah Wën.

⁶ Soŋe tufahnahn vutah vuntëwu yerun, Wënu ɲa cañëtik Iyir Aju ɲa wala wary walëw fu hna, Iyir nte ryekayehñëdëhëfu: «Apa! Rëm mën!»

⁷ Koyëna, ale-wo-le hnë wühñë gona aramp, bare fatah Wën ye; do kabi vutah vuntëwu

yerun, Wënu ɲa njëdadëhu idëw nte w̃aruñik soɲe vutah vuntëwu va.

Uryëñah Pol soɲe vëvë Galasi

⁸ Kobëri ɲa, yëtëlnawohna Wënu ɲa do vëramp wamën wale wok gena wamën paryi yerunëho.

⁹ Bare tame njëtërunëha Wënu ɲa, do Wënu ɲa yëtëku ntëbu d̃us. Awa, hak kodun avoku aŋaŋëhnëndu wënamu wale wok kwëhnana imëk gë nafa? Vëramp vëlëw hni bi yadun avokawu?

¹⁰ Ntënënërun d̃us wafac wëryampo gë wadepera wëdampo gë wëwati wëryampo do gë wabëhn wëdampo!*

¹¹ Nkehahnahnëko antë ambër mën ɲa nke nafa këm soɲe lëw hun ỹa!

¹² Vëyënta mën, këlamu geryin afaya had ami; gena bi gwëcëtabu yewu had w̃uhnë, vële wok geluhna hnë sariya hna? Kobëri ɲa ñoñ diluhna ile lavëko.

¹³ Njëtërun, soɲe ile resëbuho ỹa wohahnëbuho ỹal hun hna tac fëyawu Wahnës Wakasëk ɲa ryënkwerëyënkwe ỹa.

¹⁴ Imbahn mën ɲa gwamëlohña njëki, bare kehalunohña, kayahnëluhña fëna g'ami. Bare kacarunëhowo had mëleka Wën ma had Yesu Këris dëñk.

¹⁵ Natëkuno d̃us! Kodëfu hnësëhnu uñi cedeya: ge kokëndunëho alokëtaŋu vinkër hun vi ayëd̃awuno, ntikëndunëho. Ye lë fëlaku tame?

* **4:10 4:10** Pol nësëd soɲe viyë vile ntidëniho wasëwif w̃a do vile wok tëfëlahna mawëni vëvë Galasi va.

16 Aÿeŵ hun bi yebu kabi toña ÿa fëyadëmu?

17 Vahnë vële waÿëmpaÿendëhu vi ñadëni ðus nuÿanihu, bare iña dëŵ hni ña yivëna. Pitëndëlehnënihëfu ñadëni soñe ayegahnu gë vëhni.

18 Njivëk iña ðus ña ge fërënak ÿadü. Do iña tac nte hwëhnarunëho nte nkelahninëko ña tēfëka aworyeru kwëlëkwël.

19 Vutah mën, mbokëbu horotëndu g'ahawäry soñe hun ÿa, had asëval hnagëð, hafo pac padëku nkeya Këris ña.

20 Ñakëndëbu ðus nkelahnin hnë iÿi wati soñe hnësëhnu nësa njamah. Pëmpëhnahnëko ðus soñe hun ÿa.

Soñe Agar gë Sara

21 Pëyaryino, ŵuhnë vële pecehnëk ayewu hnë imëk sariya Moyis vi, gwëryëðiluhna bi ile kerëk Moyis ÿa?

22 Hnë kayëte wanës Wën hna kerik: «Abëraham vucan vuki nuÿako: fëndampo gë Agar nte yeho aramp ña, fëñëntaŵ fa gë Sara nte yeho asëvalu ÿa.»

23 Fandënkwerÿënkwa fa hnë iña asan g'asëval nagiko, bare fakigëna fa soñe ile nësëko Wënu ña nagahniko.

24 Watac nke ile pëhnëtanëð: vëÿi vësëval vëhi, had vakwëtëla vaki nkeniho. Agar ye had kwëtëla mbë Kuñ Sinayi ña, hn'ile njëðakawo Wënu ña sariya ÿa Moyis. Umë hnagëðëhëhni vëramp va.

25 Agar ye Ikuñ Sinayi nte ye Arabi ña. Do fëna umë fëhnëtanëð inaŵ Yerusalem bë tame

ŋi. Umë aramp ye gë vële lëdëk hnam va had gante nke Agar gë vutah vuntëwu va.

²⁶ Bare Yerusalem vë g'ambin ŷa gena aramp do umë ye hnëm fu ŷa.

²⁷ Vikerëh va pëyahnëf:

«Natëryiŷi, wëjë asëval ale wok kwëhnalihahna fatah! Dekary uhnatah wã, wëjë ale wok yëtëlihna ulav ðonk hnag!

Wëjë ale ravik a, vutah hu va yabëf ðus ntëbini vutah asëval ale hwëhnaka asan.»

²⁸ Do wuhnë, vëŷënta mën, vutah Wën yentirun had Isak, gante ntehnëkawo Wënu ŋa Abëraham ka.

²⁹ Awa fante hnagiko hnë ŋahnël asan gë asëval, këm fo ntidëhawo fante hnagiko gë Iyir Wënu ŋa, do koyëna nkok ha gaki.[†]

³⁰ Awa, ye ntehnëk Vikerëh va? Më lehnëk: «Daryehna asëval aramp aŷi g'aju, kabi aju asëval aramp aŷi tēfëlahna nuŷanti idëw ajë asëval ale wok gena aramp aŷi.»[‡]

³¹ Awa, vëŷënta mën, fuhnë geyilënëhna vutah asëval aramp, vutah asëval ale ye afaya ŷa yeyinëk.

5

Igo afaya

[†] **4:29 4:29** Awa fante hnagiko hnë ŋahnël asan gë asëval, këm fo ntidëhawo fante hnagiko gë Iyir Wënu ŋa, do koyëna nkok ha gaki. Soŋe ile ryëcëtak fagant Isëmayel gë Isak rëfëtayik ani. (Wapëgwala 21.9) [‡] **4:30 4:30** Yëkëryin iŷi yëb Wapëgwala. 21.10

¹ Soŋe ige afaya ŋa pehëtëkëfu Këris ŷa. Awa, yaŵënaryin! Antë aŵaŵu avokawu aŷabiwu gë vankënca utamp!

² Nēparyino! Ami, Pol, ntehnēdēmu: ge háci ŷa hwëtahnërun, awa Këris ŷa bokēdīna kwëhna nafa soŋe hun.

³ Do mbokēdēfu hnēsëhnu wapacëk: asan ale-wo-le ŷad káci, sariya ŷa fop rēfëka ntënën.

⁴ Wuhnë vële yëkëlehnēd asatu haryënkW Wën hna gë sariya ŷa, pitëlërun gë Këris ŷa; goryaryëluhna ile njēdākuno Wën hnë Këris ŷa.

⁵ Bare fuhnë, Wënu ŋa hwëtahnëbun ntīd sat fu haryënkW lëŵu; napēdēfun rac gë idema Iyir Ipacah iŋa.

⁶ Ale ye hnë bëmënkël gë Yesu Këris hna, kácik kácina umë kwëhnana nafa! Ihwëhn nafa ŷa, umë ye: ikwëtahn nte rufahnik g'iñal ŋa ye.

⁷ Gwër kahnëtarunëho! Awa mo yēdëhnëku nkaw ŋa soŋe memaŷehnahnu arëfu toña ŷa?

⁸ Ile porosiŋdënihu vahnë ŷi matina hnë Wën le rëhnaku hna!

⁹ Ntehnēde: «Levir toye matëndēd fop ile hnëgwik ŷa!»✧

¹⁰ Ami, Ahwëhn a njēdako ikwëtahn soŋe hun ŷa: pacëko nahadun gë ami ki. Awa ale-wo-le waŷëmpaŷëndëhu ŷa, piniŋēde, gante-wo nke ka.

¹¹ Do ami, vëŷënta mën, tēfëka kácini catahnëni bi wobu haraŋëndëwëhni vahnë va? Ge koyëna nkekënd, gokënda horotehnëndewu? Wati rac vahnë va davakëndilëhnihna g'ami kabi

rëkakëndëwohna fëyahnëndu Këris ÿa cëmëk kërëwa hna.

¹² Vële wayëmpaÿendëhu soñe háci va arabi ntëpëtani fop vëhni dënk!

¹³ Wuhnë, vëÿënta mën, macirun soñe ayewu afaya, bare inji ge afaya, antë njëdaŵu fere alihahnëndu ile ñađ ikihn vahnë nte watik mbahn hna! Geryin vëryokuñëhnël gë iña ña.

¹⁴ Sariya Moyis ÿa fop hn'ani kwëda fo pankëlëk: «Ijahnëryehna aÿënta hu ÿa had wëjë dënk.»[☆]

¹⁵ Bare ge ñarëlëdun do asemëlëndu, awa kwëtëryin hakili, ge gena umë mbëvehnëlëdun.

Imbahn gë Iyir

¹⁶ Awa wëli ile lehnëdëmu ÿa: tavëryina Iyir Ipacah inja njasary duniÿa hun ÿa, koyëna, tëfëdïluhna ile ñađ ikihn vahnë nte watik mbahn hna.

¹⁷ Viña vitac wëtëd g'ile ñađ Iyir Ipacah inja, do Iyir Ipacah inja mëtëdëni g'imbahn inja; ñëwëlëni dūs, soñe umë ye kodïluhna aliwu ile ÿadun ÿa.

¹⁸ Bare ge Iyir Ipacah ña yasaryëdëhu, goluhna hnë imëk sariya hna.

¹⁹ Tëk nunde dūs ile ntiyehnëdëhëfu ikihn vahnë nte watik mbahn hna: ndakëntal nte ñëwëk Wën gë nkeya kayah do gë tonkah,

²⁰ icëmb ile wok gena wën paryi, gë akavëla, gë iñëw vëÿënta hni, gë wasonko, gë iñëwary, gë iyap, gë iña dëb vëÿëntaŵ, gë icënkwendëlehn do pitëndëlehn vahnë;

[☆] 5:14 5.14: Soñe Walevi 19.18

²¹ iña ile kwëhnëni vahnë, use uñen dëcët, itok dëcët do viyë vihawary vile wëntëlëk gë viyë ki. Awa tame kwëtëryin hakili soñe wanj gante nësëhnëmuno kobëri ka: vële lid koyëna va vëhnuñadina yëwa Inaw Wën hna.

²² Bare wëli ile nagëd Iyir Ipacah ña ahnë hna: iña ña ye, gë uhnatah wã, gë yam ña, gë ñuñëna ña, gë iguk ntawary ña, gë ikwëhna nëf ña do gë ikwëtahn ña,

²³ ipërëna ña do gë ipëla nkaf ña. Sariya ña ñewëlēhnhna vële ye aki va!

²⁴ Vële kwëhnëk Yesu Këris va pakëni kërëwa hna fop ikihn vahnë nte watik mbahn hna gë fop viña vidëwu va.

²⁵ Age gë Iyir Ipacah ña njënëden, mawëñëfu njasaryëndëfu.

²⁶ Antë nañënanen soñe viyë vile wok kwëhnana nafa! Antë conkënden! Antë iñewary nke yëbëlan fu!

6

Idemal

¹ Vëyënta mën, ge ahnë pëlayik ga ntëntëd, wühnë vële njasaryëd Iyir Wën va bokaryëryina hn'ankaw përen hna; bare tëfëka nke gë wanës wanëñah. Kwëtëryin ñus hakili, antë awwu yëkëhnahn ña wühnë fëna.

² Demalëryindën wühnë fop: do koyëna, mawëhnëdun sariyaKëris ña.☆

³ Age ahnë ntiyahneka iñë nke, awa gel iñë, nkaf ntëwu ña dënk tokak!

☆ **6:2 6.2:** Vëvë Galasi 5.14

⁴ Arabi ale-wo-le pëcëta wapacëk gante ntid ka doku ile kwëtehnahnëka Wënu ɲa. Ge nëɲahnëka gë watac, awa tēfëka nëɲahna minu fo, hara mëntëndëlehnëna g'ile ntidëni vëyëntaw va.

⁵ Ha, ale-wo-le sah lëwu ɲa rëfëka nti.

⁶ Arabi ale haranëde wanës Wënu ɲa caha ale haranëdëha ɲa fop ifërën ile kwëhna ɲa.

⁷ Antë arokayiwu: Wënu ɲa yafanëdena. Ahn'a ile nadëk ɲa mbarëpëd.

⁸ Ale hnadëk soɲe natëndan ile hihnek mbahn dëwu hna, ahnë arac icëm ɲa mbarëpëd; bare ale hnadëk soɲe hnatah Iyir Ipacah ɲa, ahnë arac uwám sër wä mbarëpëd.

⁹ Dindënëfu ufërën hara cilëtayilënëhna; kabi ge cilëtayilënëhna, mbarëpëden ge wati ɲa tēkëk.

¹⁰ Awa, hnë wafac wale wokëfu duniya li, dokunënëfu soɲe ufërën vahnë fop, do kas soɲe vële vankinëk kwëtahn va.

Wanës watëkwa

¹¹ Tame, yëkëryin viɲi viker vicankaf, gë wëbák mën ɲa dënk kerëhnëryidëmu!

¹² Vële forosinëdëhu aháciwu va, vahnë vërac ñadëni naÿënahndëni háci hun ɲa. Iryampo le ñadëni ɲa, umë ye: kehahnëni antë ko-rotehnini soɲe ikaraɲ vahnë icëm Këriskërëwa hna.

¹³ Vële forosinëdëhu aháciwu va vëwawëhnëna vëhni dënk sariya Moyis ɲa! Naÿënahndëni fo ñadëni aháciwu.

¹⁴ Ge ami ye, icëm Ahwëhn fu Yesu Këris kërëwa hna fo hnaÿënahndëfu; kabi, rac liko

had viÿë vivë duniÿa vi cëmëk soŋe lëmën, do ami fëna, had cëmëbu soŋe viÿë vi duniÿa vi.

¹⁵ Háciru kácilihna umë fop kwëhnana nafa! Ihwëhn nafa ÿa, umë ye arabi Wënu ŋa ntifu g'ahawÿary.

¹⁶ Soŋe Isërayel ÿa, bulunda Wën ÿa gë fop vëÿëntaŵ va, ŵuhnë vële rëfëd iÿi siyab va, arabi Wënu ŋa maŵëryanëhnu yam ÿa gë kaÿëhnahn dëŵu ŋa.

¹⁷ Tame, antë ahnë mbok njonëhne ryëñah, kabi vandag vante hnuÿabu soŋe Yesu va yeho mbahn hna.

¹⁸ Vëÿënta mën, arabi ipërëna Ahwëhn fu ÿa Yesu Këris nke gë ŵuhnë! Amina.

Wamey
Wamey: Vikerëh Vikasëk Wën gë Wapëgwala (New Testament+)

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 19 Dec 2025 from source
files dated 1 May 2025
f961026b-f72f-5bd7-9f75-efa7f932577e